

An 't Aamsvèn in 1914.

Cato Elderink



Ees eemmoal in dage van smos aleer,
Wönde op den Hölterhof nen heer,
Kot an 't Aamsvèn, op de Pruusche grèns,
Op ne stè, dee's dow van oalds wal kèns.
Want 't is nog nich zoo lang elëen,
Doo ko'j door nog spuren van gravens zeen.
De weidekultuur en de ni-je tied
Gungen doar oaver en maakten et liek.
Eeuwen al zeent der vuurbi'j egoan,
Seent door den Hölterhof hef estoan,
Meer van vader op zön, van moond tot moond,
Geet nog bi-j de boeren de mare roond,
Hoo door vervöl tot puun en stof,
Dat stërke geslacht en den Hölterhof.

Et was in de tied van de zwatte dood,
Op 'n Enscheder esch was bitteren nood.
In drie hofstèen alleen an den heerd glom vuur,
'n Blauw dämpken vleug der van duur to duur.
En woor dat blauwe dämpken kwam,
Störf an den heerd de hëldre vlam,
Door störf de boer, de vrouw, et keend,
Et hoes vervöl duur weer en weend.
Zoo is 't op den Hölterhof agoan;
Met al wat lëven har, was et edoan.
Et heed kroop oaver et roggelaand,
't Dak völ in, grös greuïde oet de waand,
De duun leut oet de hengen los,
Greün lè zik oaver de vlooren et mos.

'n Meinschenkeend kwam der noa joor en dag,
Luk ni-jend woo toch den Hof door zoo lag,
Zoo stil en verkommen et hoes en den stal.
Hee geet der ees in, an den heerd steet hee al,
Door! Schrik sleet em um 't härt, hee heurt
Woo in de bedstè zik zachte wat reurt,
Lëft hier nog wat? Is hier nog wel?
Door spreenk 't em vuurbi-j en jach oaver de dël,
De wolvin, de wolvin, dee heerscht op 'n Hof,
In de bedstè wörp ze de welpen of.

Zoo is dat vertelsel van smos aleer,
Now zeent der gin wulve en speuke meer,
Hoast wast der gin heed meer in 't Almansvèld,
Meer 'n joor is 't nog van krieg en gewèld,
Kot an 't Aamsven an de Pruusche grèns,
Geet nog nig veilig 'n Christenmeinsch!
Door is ne barrière van koaren en droad.
Beervätkes en allerlei huuslik geroad,
Gin meinsche geet der meer hèn en weer
Gin meinsche, alleinig.... Dortmund beer! *)

*) In de eerste oorlogsdagen van 1914 werd,
van uit de herberg over de grens,
over de barrière bier verkocht.



Tekeningen Leen Drent.